

Ultimo discurso di Booshi Wever den Parlamento



ORANJESTAD (AAN): Pa ultimo biaha por lo pronto, drs. Booshi Wever a duna un discurso den Parlamento. Esaki na ocasion di su despedida como miembro di Parlamento.

Rey Salomon conoci pa su sabiduria a bisa : "Alles heeft zijn uur en ieder ding onder de hemel zijn tijd." = "Cada cos tin su ora y cada cos bao di cielo tin su tempo".

Awe ta toca na mi persona, despues di a drenta politica na año 1983 y despues di a sirbi mi pais Aruba y mi pueblo stima pa 30 año sea como miembro di Parlamento, vice-Presidente y Presidente di Parlamento, Ministro Plenipotenciario, Ministro di Salubridad, Medio Ambiente, Asuntunan Administrativo y di Stranheria, y e ultimo 4 añanan aki atrobe como Parlamentario, pa tuma despedida en todo caso temporario di e organo aki.

Na momento cu nos Lider inmortal sr. Betico Croes, den feliz memoria, a acerca mi persona pa subi lista politico y asina duna un aporte hunto cu n'e na nos pais, mi no a realisa por completo e enbergadura y responsabilidad cu bo ta tuma riba bo schouder pa guia, tuma decisionnan y goberna bo pais na un manera husto y cu rectitud. Paso siendo representante di pueblo como Parlamentario y como Ministro, ta NOS ta e consenshi di e pueblo.

Cada un di nos acto y decision, tin su efecto y consecuencia(nan) riba sea un persona so, un grupo of henter un comunidad. P'esey ta importante pa laga Todopoderoso ta bo guia. Y ora bo NO ta teme Señor, e ora ey poder por subi cabez, y bo ta capaz di kere cu ta abo so por hac' y deshaci, sin duna cuenta na ningun hende, peso ta abo mes ta ley. Un error grandi cu hopi di nos ta comete.

Durante e 30 añanan aki mi a experienciá hopi acontecimen-

to, bon y malo, situacionnan hopi fastioso y di hopi tension, pero tambe momentonan hopi agradabel y inolvidable. No tin suficiente tempo pa menciona tur, pero si mi kier a highlight algun cu a marca Booshi como persona y como politico:

1. E diploma cu mi a falsifica, pa cual mi no a perhudica ningun hende mas cu no ta mi mes, mientras mi a defraudar mi kerido tata, mescos tambe mi esposa, pa cual mi a hurra mi mes cu mi no lo haci algo asina mas y mi a bay back y mi a studia y mi a logra mi titulo academico. Den mi carera politico, esaki a worde usa varios biaha door di mi contrincantenan y coleganan, pero manera semper mi a bisa y mi lo keda ripiti, nan ta tira esaki na mi cara ora cu no tin argumento.

2. E fayecimento di nos lider inmortal sr. Betico Croes, cu a cambia e panorama politico di Aruba por completo te dia di awe, na unda den MEP, como Parlamentario Independiente y como lider di UPP mi a y mi lo sigui lucha pa preservacion di nos autonomia cu tanto sacrificio a costa nos pueblo pa obtener.

3. E transicion di campaña cas pa cas cu reunionnan den barrio, pa awe a transforma cu nos ta riba facebook y twitter, na unda discusionnan ta worde hiba terecht y onterecht. No na nos isla só pero tambe paisnan grandi usando e medionan moderno aki, a sa di lanta pueblo contra presidentenan y destitui nan for di nan cargo pa reinstitui democracia back na nan pais. Prensa a hunga un rol grandi den esaki, sin embargo aki na Aruba nos tur por a observa lo contrario, unda un parti di nos prensa ta comprometi y cu SI a sa di haci nan trabao pa un partido, pero NO a cumpli cu nan tarea primordial, esta di investiga y trece tur dos banda di e medaya.

4. M'a wak durante añanan cu Parlamento a worde poni un banda y a para bira un organo di tercera categoria bao di e Gabinete anterior y atrobe nos por wak cu Dialogo Social a bira capa pa carga responsabilidad, di esnan cu a ser yama pa pueblo pa haci tal. Durante di campaña nan tin boca grandi, pero ora puntje yega bij paaltje, nan kier sconde y ta busca "draagvlak" pa carga responsabilidad di errorman cu NAN y nan so a comete, den maneho di nos pais.

5. M'a observa cu durante añanan no tin debate riba isuesnan real cu ta toca nos pueblo, sino cu atakenan personal a para bira orden di dia, na radio, na tv, den prensa, riba facebook, unda cu ta fomenta odio y rencor riba esnan cu NO ta comparti nan ideologia of vision. No tabata por a dialoga mas ni paden ni pafor di sala di Parlamento, como personanan cu ta controla gobiernu.

6. Tambe nos por a ripara cu enbes di un campaña di issue y debate riba programa di partido, nos campaña electoral a comberti su mes mas den un "carnaval politico", organizando fiestanan y haci promesanan personal na votadornan. Y mi ta kere cu nos sistema politico, nos sistema di democracia parlamentario, mester conoce un revision, mientras cu nos mester traha pa crea un comunidad mas critico y cu NO ta worde teni abou pa no por opina y djis sigui tras palabranan y promesanan bunita so.

7. Desaroynan politico di ultimo año tambe a coy un rumbo cu nos no ta custumbra aki na Aruba. Desarojo cu nos por bisa cu a inicia na december 2010, ora cu e mesun Dialogo Social aki ta pone como condicion cu mester bin cu un ver-soberingswet pa asina ey por tuma medidanen. Y tur esnan cu a sostene e ley aki bao di e pretexto cu esaki lo ta na beneficio di pueblo, awe nos por mira cu tur ta keto keto y ta acepta pa nos haya un gabinete di 9 minister na lugar di 7 minister, cu tur e consencuencia financiero pa nos pais, sin papia mes di e nombrenan cu a worde duna na varios ministerio of extencionnan. Mi kier a djies duna un ehempel so, esta Husticia y IASA. Henter e arte di politica a cambia aki na Aruba, unda parce principianan no ta

conta mas.

Mi lo no ta sincero cu tur presente, si mi no bisa cu mi ta preocupa. Mi ta masha, masha preocupa pa futuro di mi yiu- y nietonan en particular, y di nos pueblo en general, mirando e direccion cu nos dushi isla ta bayendo.

Nos no por bay back den tempo y cambia e rumbo. Ohala esaki tabata por. Pero loke si nos tur por haci, particularmente esnan cu awor ta bay tuma e cargo di Parlamentario pa e siguiente periodo di gobernacion, ta di ser critico y investiga, haci pregunta y busca contesta. Laga bo voz resona ora cu bo ta wak cu cosnan ta bay robez! Tene den mente cu Parlamento ta controla y ta gobiernu tin e tarea di responsabilisa su mes na Parlamento y no vice versa.

Cu e tarea lo bay ta uno masha pisa, esey cifranan y rapportnan mes a indica caba. Pobreza, criminalidad, debe, falta di trabao, inseguridad, miedo, ignorancia, intimidacion, ta loke awe ta azotando nos pueblo y medidanen cu mester worde tuma riba lomba di pueblo.

Tin un poesia di Hubert Booi cu por ser usa como un spiel, pa nos medita riba e palabranan aki: "Y ora Dios bisa cu ta basta, nos kier yora". Ma cuanto biaha nos no ta resa "Nos Tata", sin pensa cu e pan cu nos ta pidi y haya, no ta pa nos so, sino tambe pa nos ruman, kende

kizas no tin rosea mas pa pidi locual cu otro tin na abundancia. Rikeza di mundo mal parti, den poco hende sin sentimento, cu kier mas pan pa nan so, sin corda nan ruman.

Cu Dios duna e proximo Parlamentarionan y gobernantenan hopi sabiduria y cu ta hendenan cu ta teme Señor pa asina nan por traha na bienestar di nos dushi pueblo Arubano.

Mi kier a yama danki na e personal di Griffie di Parlamento cu durante añanan a duna tur loke tabata na nan alcanse pa por a yuda mi. Na tur mi familiares, rumannan, amigo y amiganan, campañadornan, sostenedornan, conseheronan cu durante 30 año a sa di conseha mi, critica mi, sostene mi den mi carera politico tanto den MEP como awor den UPP. Alavez na tur miembronan di Prensa tambe ta bay mi palabranan di gradicimento.

En especial mi kier a gradici mi señora Marilyn y mi 4 yiunan cu ta esnan cu mas a carga pasenshi cu mi y semper a apoya mi. Mi ta gradici Señor pa a duna mi e oportunidad pa sirbi mi pais durante 30 año largo y ta pidi pa E tene misericordia cu nos y bendiciona nos isla semper. Mi lo no bisa ayo, pero hasta la bista, paso tanten cu mi tin bida y salud, mi lo keda vigila, conseha y resona mi voz ora cu ta toca interes di nos pueblo tan stima.